

# Ռ.Ա.Կուսակցութեան Նամակը Միխայիլ Կորպաչեւի՝ Արցախի Նորագոյն Կացութեան Առթիւ

Մեծայարգ Տիար Միխայիլ Կորպաչեւ  
Նախագահ Խորհրդային Միութեան  
Գերագոյն Խորհուրդի  
Մոսկուա

Մեծայարգ Տիար Նախագահ,

Հայկական եւ Ատրպէյճանական Խորհրդային Ընկերվարական Հանրապետութիւններուն միջեւ լարուածութիւնը հասած է այնպիսի աստիճանի մը, ուր երկու երկիրներու բնակիչները իրենք զիրենք կը գտնեն աղիտաւոր պատերազմի մը եզրին: Աղէտը՝ որ շրջանը կրնայ վերածել նոր Լիբանանի:

Բոլոր տեղեկութիւնները կը յուշեն թէ Լեռնային Ղարաբաղի բնակչութեան ծրագրեալ կոտորածը վերահաս է: Վիթխարի պատուհասի մը ուրուականը կը թեւածէ այդ պաշարեալ երկրին

վրայ: Ձեզի կը դիմենք անյապաղ միջամտելու եւ կասեցնելու այս անողորքելի յառաջխաղացումը դէպի ողբերգութեան անդունդը:

Պրն. Նախագահ, Դուք եւ Ձեր գլխաւորած կառավարութիւնը Յունուար ամսուն Լեռնային Ղարաբաղի համար Յատուկ Կառավարման մարմնի մը կազմութեան են եւ այդպիսով պատմականօրէն հայկական այդ մարզը Մոսկուայի ուղղակի հակակշռին ներքեւ դրուել է ի վեր պահած էք անբացատրելի լռութիւն մը:

Այսօր Լեռնային Ղարաբաղը ամբողջովին շրջապատուած է ազերի զինեալ յորդաններով, որոնք պատրաստ են ներխուժելու այդ շրջանը եւ բազմապատիկ կրկնելու 28 Փետրուար 1988ին Ատրպէյճանի Սումկայիթ քաղաքին մէջ

(Շար.ը տեսնել 5րդ էջ)

# Ռ.Ա.Կ-Ի ՆԱՄԱԿԸ ԿՈՐՊԱՉՈՎԻ

(Շար. առաջին էջէն)

անմեղ հայերու դէմ գործադրուած ջարդը: Ջարդ մը, Պրն. Նախագահ, զոր կիրարկողները տակաւին անպատիժ կը շրջագայեն այդ քաղաքին փողոցներուն մէջ, միշտ պատրաստ՝ կրկնելու իրենց ոճիրը:

Հայ ժողովուրդն ու մարդկութիւնը չեն կրնար արտօնել եւ պիտի չարտօնեն նման կոտորած մը:

Հետեւեալ դէպքերը ահազանգի մատնած են հայութիւնը աշխարհով մէկ.-

- Հայաստանը ներկայիս կը դիմագրաւէ Ատրպէյճանի կողմէ պարտադրուած տնտեսական օղակում մը. - դադրած է վառելանիւթի հոսքը եւ կանգ առած են երկաթուղիներն ու փոխադրամիջոցները: Ասիկա չէ Ջեր ջատագոված միջազգայնականութիւնն ու ընկերվարական եղբայրութիւնը:

- Ամէն օր հայ մը կը սպաննուի Ատրպէյճանի եւ Լեռնային Ղարաբաղի մէջ: Ասիկա չէ այն կարգի ապահովութիւնը, զոր Ջեր կառավարութիւնը պարտի հայթայթել իր քաղաքացիներուն:

- Լեռնային Ղարաբաղի 165,000 հայութիւնը, - 80 տոկոսը մարզին բնակչութեան, - տնտեսապէս կ'ենթարկուի ազերի յելուզակներու յարձակումներուն, կը սպաննուի, կը խոշտանգուի եւ կը չարչարուի: Ասիկա չէ այն եղանակը, որով խորհրդային քաղաքացիներ պարտին յարգել մարդկային իրաւունքները:

- 1988ի Դեկտեմբերի երկրաշարժէն վերապրողներուն նուիրուած տասնեակներով չեխուլովաքեան կանխակառուցեալ տուներ համարեալ ամբողջովին կործանուած են ատրպէյճանական տարածքէն անցնող գնացքներու վրայ: Ասիկա չէ այն կերպը, որով մարդիկ պարտին վարուիլ Խորհրդային Միութեան մէջ:

- Լեռնային Ղարաբաղի մէջ պատկերասփռային հաղորդումները հետեւողականօրէն խանգարուած են ազերիներու կողմէ՝ ատրպէյճանական կառավարութեան աշխիւմով: Հայաստանէն այդ շրջանը գացող կառախումբեր եւ ինչնաշարժներ կանոնադրաբար ենթարկուած են յարձակումներուն ազերի զինեալ ջոկատներու, որոնք պատճառած են մահեր, վիրաւորած են բազմատասնեակ մարդիկ եւ փնացուցած են ուտեստեղէն ու շինանիւթեր: Եւ այս բաները կը պատահին փոքր հողաշերտի մը մէջ, ուր մօտ 6,000 ներքին ապահովութեան ուժեր տեղադրուած են...: Ինչպէս կարելի է հանդուրժել նման կացութեան մը:

- Այդ ուժերու երեք բարձրաստիճան հրամանատարներ Շուշիի մէջ, անցեալ շաբաթ, ազերի ամբոխին կողմէ վար դրուած են իբրեւ պատանդ: Այդ հրամանատարները, հաւանաբար Մուկուայէն տրուած հրահանգներու համաձայն, տեղի տուած են ահաբեկիչներու պահանջներուն: Դուք եւ Ջեր կառավարութիւնը, պրն. Նախագահ, հաստատած էք վտանգաւոր ու դատապարտելի նախընթաց մը:

Պրն. Նախագահ,

Ջեր լռութիւնն ու հատու կարգադրութեան ամբողջական բացակայութիւնը մեծապէս նպաստած են Անդրկովկասի մէջ այս ողբերգական կացութեան ստեղծումին: Ռամկավարացումի եւ հրապարակայնութեան Ջեր ողջունելի ծրագրին սկզբունքները գործի չեն վերածուած 1928ին ժողէֆ Ստալինի կողմէ Լեռնային Ղարաբաղի հայ ազգաբնակչութեան դէմ գործադրուած պատմական անարդարութիւնը սրբագրելու ուղղութեամբ:

Դուք խիզախ, արդարակորով ու մարդկային իրաւունքները յարգողի կեցուածք դրսեւորեցիք Ստալինի գործած ոճիրներն ու այլ անարդարութիւնները դատապարտելու մ' հայց ձախողեցաք Ջեր համապարփակ ծրագրին մէջ նկատի առնելու Լեռնային Ղարաբաղի հայոց կամքը: Ինչո՞ւ:

Ինչո՞ւ գիտակցաբար թոյլ կուտաք գործադրութիւնը ահաւոր անարդարութեան մը: Ներկայ տագնապէն դուրս գալու միակ ուղին ՔԱՂԱՔԱԿԱՆ լուծումն է՝ Լեռնային Ղարաբաղի վերամիացումը Հայաստանի: Ասիկա վրէժխնդրութիւն չէ: Հին Արցախը Հայաստանի անբաժանելի մասնիկը եղած է 3,000 տարիներ շարունակ, եւ ճաշակած է Ստալինի նենգութեամբ 1928ին գոյառած բաժանումի ողբերգութիւնը: Անորը քաղաքական աքթ մըն էր, այդպէս պէտք է ըլլա նաեւ Ջերը՝ դիմադարձելու հսկայ սխալի մը:

Թող արդարութիւնը վերահաստատուի, Պրն. Նախագահ, թող Արցախի հնամենի եւ սրբազան հողը վերջապէս միանայ Հայաստանի, որպէսզի համայն աշխարհի մարդիկ վերստին հաւատան Ջեր անկեղծութեան՝ երբ շեշտէք ռամկավարացումի եւ հրապարակայնութեան սկզբունքները: Մենք տակաւին կը հաւատանք Ջեր նպատակներուն անկեղծութեան եւ զօրավիգ կը կանգնենք զանոնք իրագործելու Ջեր ճիգերուն:

ԿԵԴՐՈՆԱԿԱՆ ՎԱՐՉՈՒԹԻՒՆ  
ՌԱՄԿԱՎԱՐ ԱԶԱՏԱԿԱՆ ԿՈՒՍԱԿՑՈՒԹԵԱՆ  
18 Սեպտ. 1989